

KPDNHEP, MOA adakan perbincangan bersama 12 pemain industri sektor peruncitan

Fauzi Suhaimi, Astro Awani | Diterbitkan pada Mac 20, 2020 12:22 MYT



Alexander Nanta Linggi dan Ronald Kiandee pada sidang media di Putrajaya pada Jumaat. - Gambar Astro AWANI

PUTRAJAYA: Kementerian Perdagangan Dalam Negeri dan Hal Ehwal Pengguna (KPDNHEP) dan Kementerian Pertanian dan Industri Makanan (MOA) komited mengadakan perbincangan bersama 12 pemain industri sektor peruncitan untuk memastikan semua bekalan barangan keperluan harian tidak terputus.

Menteri KPDNHEP, Datuk Alexander Nanta Linggi berkata, usaha itu bagi memastikan semua bekalan keperluan harian mencukupi sepanjang tempoh Perintah Kawalan Pergerakan di seluruh negara.

"Perintah Kawalan Pergerakan yang diumumkan kerajaan sedikit sebanyak menimbulkan kesulitan dan kesukaran kepada peniaga dan mencetuskan suasana pembelian panik dalam kalangan pengguna.

“Dalam hal ini, pihak KPDNHEP dan MOA sentiasa proaktif memastikan bekalan sentiasa mencukupi di seluruh negara sehingga 31 Mac ini,” katanya dalam sidang media di sini pada Jumaat.

Yang turut hadir Menteri MOA, Datuk Seri Dr. Ronald Kiandee, Ketua Setiausaha MOA, Datuk Zainal Azman Abu Seman dan Ketua Setiausaha KPDNHEP, Datuk Seri Hasnol Zan Zam Ahmad.

Dalam pada itu, Alexander Nanta berkata, pasukan penguatkuasa KPDNHEP turut menjalankan pemantauan di premis-premis pasaraya, kedai runcit dan kedai serbaneka bagi memastikan bekalan mencukupi serta memantau harga barangan.

“Pihak industri diingatkan supaya sentiasa memastikan bekalan mencukupi dan memaklumkan segera kepada pihak kami sekiranya berlaku masalah bekalan daripada pengeluar. Ini penting agar rantai bekalan tidak terganggu.

“Pengendali pasaraya juga diharapkan agar tidak menaikkan harga barangan khususnya dalam tempoh kawalan ini dan pengguna diminta untuk melaporkan sebarang kenaikan harga serta isu bekalan kepada KPDNHEP melalui aplikasi WhatsApp di talian 019-2794317,” jelasnya.

<http://www.astroawani.com/berita-malaysia/kpdnhep-moa-adakan-perbincangan-bersama-12-pemain-industri-sektor-peruncitan-234457>

